

Yëkkuö skà kit Pedro tö, i' tã ide böt

2 Pedro

Yëkkuö skà i' kit Pedro tö. Ie' wã ijchënewã tö iblërkewatke, e' yë'itö 2 Pedro 1.12-15 e' kî. Jesús mik ërblökwa_kpa weirkë ierblö ñe' kuekî, e'pa a Pedro tö yëkkuö i' kit ie'pa ër one Jesús tté mokijë e' ska' as iserdak yësyësë ena këkraë Jesús a. E' kîiëtã ie' tö ie'pa a ieri mène tö pë' e' ò tö ie'pa dör Jesús mik ërblökwa_kpa esepa döraë ie'pa shua ikitöukrak. Ie' tö ie'pa a iché tö wës s'kîtö'ukwa_kpa ñe'sepa sërdaë. Nies ie' tö ie'pa a iché tö s'kîtö'ukwa_kpa we'ikeraë Skëköl tö. E' kîiëtã ì tkömi kã i' ërkewatke etã e' eri mène Pedro tö ie'pa a. Ie' tö iché kã i' ërkewa e' këwö dewatke tsinet, e' këwö ska' tã ie'pa kawöta senuk yësyësë Jesús kïkokaie.

Nies Pedro tö iché tö mokijë Jesús datskene erë Skëköl tö sulitane sueke ër siarë wa ena ie' kî ikiane tö se' ër manë'ü tã se' ërblö Jesús mik. E' paneke ie' tö ër bua' wa, e' kuekî kam ie' tö Jesús patkõne.

Shkë'wè

1 ¹Ye' dör Simón Pedro. Ye' dör Jesucristo kanè méso. Nies ye' dör ittekölpa tsá, e'pa eköl. Jesucristo dör Skëköl ena S'tsãtkökwa_k. Ie' dör yësyësë, e' batamik sa' de ërblök ie' mik. Ye' tso' yëkkuö i' shtök wépa de ërblök ie' mik buaë mokijë wës sa' es, esepa a.

²Skëköl ena Skëképa Jesús as e'pa ër buaë chò ena sene bèrë mù a' a taië, a' kî batsmir buaë ie'pa mik e' a.

Se' ër diché iò senuk yësyësë Skëköl a

³Jesús tö se' klö'bak as se' dò ie' tã ñita ie' olo taië e' a, ñies as se' ser wës ie' ser es. Se' bätse ie' mik, e' wa ì kôs kiane se' kî sënöie wës ie' kî ikiane es e' me'tkeitö se' a ie' diché taië e' wa. ⁴Íyi ekkë kôs wa ie' kablë' se' a as se' dò wës ie' wák dër es, as se' tkòshkar ì sulu tso' kã i' a wamblak se' éna tö se' sulu'wëwami ese ulã a. Skëköl kablë' se' a, e' me'tkeitö se' a, e' dör taië buaë shütë. ⁵E' kuekî a' e' diché íó a' ërblöke

Cristo mik, e' k_íie senuk yësyësë. Sene yësyësë, e' k_íie Skëköl íyi anuk. 6 Skëköl íyi ane, e' k_íie e' kkò'nuk. E' kkò'nè, e' k_íie íyi panuk bèrè. Íyi panè bèrè, e' k_íie er mukwà Skëköl è k_í. 7 Er mèwà Skëköl è k_í, e' k_íie ñi sauk er bua' wa wës ñi èlpa es. Ñi suè er bua' wa, e' k_íie ñi dalèritsök. 8 Íyi ekkè kos weke a' tò, ñies ikí weke a' tò kekraë, e' ta e' wà kiane chè tò mokí a' bàtsè buaë Skëkëpa Jesucristo mik. A' serke es, e' ta ì kos weke a' tò Skëköl a, e' wà dörattsà buaë. 9 Erè wépa e' chò tò ie'pa erblò Cristo mik, erè ie'pa kè tò íyi ekkè wawè, esepa dör wës s'wöbla kè wawër buaë es. Ie'pa kè éna iwà ane buaë. Wësua ie'pa éna ichowa tò ì sulu wamblè' ie'pa tò, e' pairi'ttsa Skëköl tò ie'pa k_í. 10 A yamipa, a' e' diché ió senuk buaë yësyësë kekraë, e' wa iwà kkayërdaë tò mokí Skëköl tò a' klòg'bak, a' shukitbakitò iwák a. A' tò iwé es, e' ta a' erblòke Cristo mik, e' kè olo'yepa a' tò yës. 11 E' wa aishkuö ta a' kirdawà buaë ì blúie Skëkëpa Jesucristo dör S'tsatkòkwak, e' tso' e' a. E' dör yöbiè.

12 Íyi ekkè jcher a' wà buaë. Ttè mokí wa a' e' wöbla', e' a a' tso' e' tkëulewà darèrè. Erè ye' tò a' a' ikí chè michoè as a' kè éna ichòwa. 13 Ye' tso'ia' ttsè'ka, età ye' a' ta buaë idir tò ye' tò a' a' ttè i' k_í chè as a' tò íyi ekkè wà bikeitsò kekraë. 14 Skëkëpa Jesucristo tò ye' a' iyè' tò wekkè alè ta ye' kè ku'ia' ká i' k_í. 15 Ye' tò ì kos weraë as ttè i' kè chòwa a' éna yës i'ñe ta ñies mik ye' blènewatke e' ukuökí ta.

16 Skëkëpa Jesucristo olo ta' taiè, e' su' sa' tò sa' wákpa wöbla wa. E' kuekí mik sa' tò a' wöbla' ie' diché ta' taiè ena ie' datskene e' tté wa, età kè sa' wà ipakane a' a' ttè kè wà ta' wës sa' wákpa tò ibikeitsè chè es a' kitò'woje. 17-18 Mik sa' dè'rò ie' ta' kabata batse'r, e' tukir k_í, età ee Skëköl dör S'yé, e' tò ie' kikéka taiè. Ttò datse Skëköl olo ta' taiè e' ska', e' tò ie' ché i' es: “Sè dör ye' alà dalèr taiè ye' éna, e' wër ye' wa buaë shute.” E' kos su' sa' tò. Ttò ñe' datse ká jai a, e' ttsè' sa' tò, sa' tso'ñak ie' ta' ee e' kuekí.

19 Í su' sa' tò, ì ttsè' sa' tò, e' tò ikí cheke se' a' tò Jesús tté tso' kitule Skëköl yëkkuö k_í ká iaiaë ittekölpa wà, e' yène mokí. E' kuekí ttè kit ie'pa tò yëkkuö k_í, e' wà iutök a' kawötà bua'iewa. Ttè e' dör wës bö'wö batsèka stui a' tò ká olo ppeeke ese es. E' tò se' er ñi'weke as se' éna iar tò ì dör mokí, ì dör kache. Ttè e' tò se' kimeräè dò mik Skëkëpa Jesucristo datskene età. Mik ie' de, età ì kos ardaë buaë se' éna, e' dör wës ká ñir s'k_í es. Jesucristo dör wës bëkwö bërie wërke bla'mi e' es. 20-21 Erè ì kos tsatà a' wà ijchenú tò ì ye' Skëköl ttekölpa tò, tso' kitule Skëköl yëkkuö k_í, e' kè yène ie'pa wà ie'pa wákpa er wa. Erè Skëköl tò ie'pa ké ichök wës ie' k_í ikiane es Wiköl Batse'r wa. E' kuekí ì kit Skëköl ttekölpa tò ká iaiaë, e' kè yène ie'pa wà iwákpa er wa, e' dör Skëköl ttè mokí.

S'wöbla'ukwakpa kache tté wa

2 1 Ká iaiaë Israel aleripa shuà kachökwakpa e' ka'ka e' chök tò ie'pa dör Skëköl ttekölpa. Es ñies i'ñe ta a' shuà kachökwakpa e' kóraka

e' chök tō ie'pa dör s'wöbla'ukwakpa Skëköl ttè wa. Ie'pa e' ò tō ie'pa tso' ttè moki pakök, erè ttè wa ie'pa tō s'wöbla'weke, e' tō s'er sulu'wëwami e' iütésö, e' tã Skëköl tō s'we'ikeraë. Skëkëpa Jesucristo tō ie'pa nuì tō'ttsa, erè e' wák watéttsa ie'pa tō. E' kueki ie' tō ie'pa we'ikeraë bet. ²Erè taië s'yamipa ardarö kache ttè e' a itrërdarak taië wes iwöbla'ukwakpa es. Ie'pa kueki ttè moki e' cheraë suluë pè' malepa tō. ³S'wöbla'ukwakpa kache tté wa, e'pa ki inuköl è kiane taië, e' kueki ie'pa tō a' inuköl yerattsä ttè kè wà tã' pakeke ie'pa tō ese wa. E' kueki kã iaiäe ie'pa esepa wöme'ttsabak weinuk Skëköl tō, e' kè chë'wa ie' éna.

⁴Kã iaiäe Skëköl biyöchökwakpa welepa tō ì sulu wamblè' ie' ki, e' nuì kè olo'yane ie' wã ie'pa ki. Ie' tō ie'pa batrélor bö' ké a, ee ie'pa tso' wötëule moulewa stui a ie'pa kichateraëitö aishkuö tã e' panuk. ⁵Ñies kã iaiäe wakpa bak senuk Noé këska' tã, e'pa tō ì sulu wamblè' taië, e' nuì kè olo'yane ie' wã ie'pa ki. Noé tō ipaka' ie'pa a tō ie'pa kawõtã senuk yësyësë, erè ie'pa kè wã ie' ttè iütëne. E' kueki Skëköl tō ie'pa ewëwa di' taië wa. Noé ena imalepa döka kul (7), e'pa è tsatké Skëköl tō di' taië yöki. ⁶⁻⁸Ñies kã iaiäe kã böt kië Sodoma ena Gomorra, e' wakpa dör pè' sulusi. E'pa shua wëm serke eköl kië Lot, e' serke yësyësë. Ie'pa trër taië, e' ttseke, e' sueke ie' tō këkraë, e' tō ie' dör buaë e' eriaweke siarë. Ie'pa nuì ki Skëköl tō ie'pa wöméttsa ewëwa. Ie' tō ie'pa ena ie'pa kã e' kos ña'wëwa seraã imuluchka è atë. Erè Lot, e' è tsatkéttstaitö. Ie' tō ie'pa ewëwa es iwà kkachöie sulitane a tō es itköraë pè' sulusipa kos esepa tã.

⁹E' kos bak kã iaiäe, e' wa se' wã ijcher tō wëpa serke buaë yësyësë, esepa tsatkërmi buaë Skëköl a ì kos tō ie'pa we'ikeke e' ulà a. Ñies se' wã ijcher tō wëpa dör ì sulu wamblökwakpa, esepa tso' blëule ie' wã ishulirkerak e' kéwö panuk. ¹⁰Wëpa e' mettsa e' ia'ukka sene sulusi wa wes ie'pa wák dër sulu ki ikiane es ena Skëköl ttè watéttsarakitö, esepa kos we'ikeraëitö taië s'malepa tsata.

S'wöbla'ukwakpa kache tté wa, e'pa e' wamblörak kësik kësik, kè tō ì ulé klö'wëta', iwökir darërëë. Ie'pa kè suane wëpa olo tã' taië, esepa chök suluë. ¹¹Skëköl biyöchökwakpa diché tã' taië, olo tã' taië s'wöbla'ukwakpa kache tté wa, esepa tsata, erè ie'pa kè tō imalepa dör suluë esepa cheta' Skëköl a suluë as ikichatër. ¹²Erè ì sulu wambleke s'wöbla'ukwakpa kache tté wa, esepa tō, e' wamblekerakitö kè wà bikeitsule wes iyiwak kañiru kè a kã artã' tso' klö'wëwã ttëwã es. Ì kè ane ie'pa éna, e' kos cheke suluë ie'pa tō. Ie'pa duörawã wes iyiwak kañiru ttëwã es. ¹³Ie'pa tō s'malepa we'ikeke, e' skéie ie'pa weirdäe siarë. Ì sulu tō ie'pa ttsë'weke buaë, ese kos wambleke ie'pa tō taië ñiwe kè jaër tã'ia, ese tō ie'pa ttsë'weke buaë. Mik a' ñi dapa'uke chkök ñita di'yök ñita, etã ie'pa tso' a' shua ì sulu wamblök e' ttsë'woie buaë. Ese wa ie'pa éna a' kitö'wak. Es ie'pa tō a' kawö sulu'wekewa. Ie'pa tō a' jaëwekëka taië. ¹⁴Ie'pa er me'rie trë è ki. Ie'pa kè shtrirtã'wã ì sulu wamblök. Wëpa kè

e' tkënewā darërë S'tsatkōkwak ttë a, esepa dakĩñekerakitō as ie'pa tō ì sulu wamblōne wës ie'pa es. Ie'pa tō inukōl è kkecheke tajë këkraë. Ie'pa wōme'ttsabak kichatée Skëkōl tō. ¹⁵⁻¹⁶Ie'pa dör wës s'cholor es. Ñalā yësüesë e' olo'yé ie'pa tō e' wambloie wës ká iaiäë Beor alà kië Balaam dör Skëkōl tteköl, e' e' wamblë' es. Ie' mí ì sulu wamblök inukōl è dalërmik, erë Skëkōl tō ie' burro ké ttökka ie' tã tã iuñéitō tã ichéitō ia: çì wambleke be' tō aljie? E' tō Balaam wökl'owé.

¹⁷S'wöbla'ukwakpa kache tté wa, e'pa dör wës di' tum itò kè a di' tã' es. Ie'pa dör wës kalj morka mochka a uyè siwã' tō kè wà yërta' es. Ie'pa wōmeulettšã weinuk michoë stui ké a. ¹⁸Ttë pakeke ie'pa tō e' ttsë'r buaë, erë kè iwã tã'. Ì sulu kukuëña ie'pa wã ena ì sulu kiane s'wák dër sulu e' kï, e' wa ie'pa tō wépa e' yéttšã tsaririë iserkerak kitëule e' ulà a, esepa erkiöwekekane as iarminë ì sulu a. ¹⁹Ie'pa tō icheke: “A' tō sa' ttë iüté, e' tã a' kè ku'ia klöulewã ì ulà a, a' sermi wës a' wákpa kï ikiane es.” Ie'pa tō icheke es, erë ie'pa wákpa tso' klöulewã ì sulu ulà a, ie'pa kè a e' yërpattšã wës. Mik se' kè a e' yënettšã ì ulà a, etã e' wã dör tō se' tso' klöulewã iulã a. ²⁰Skëképa Jesucristo dör S'tsatkōkwak e' mik se' e' batsé, e' wa sene sulusi tso' ká i' a e' olo'ya'sö. Erë se' anemine ì sulu ulà ane, kè tō ilo'yeta', e' tã se' a e' dör sulu ichökle kewe tsatã. ²¹Se' tō sene yësüesë e' ttë klö'bak buaë kewe. Erë e' ukuökj tã ttë dalöiëno batse'r mène se' a, e' olo'yésö, e'ma buaë idir tō kè sö ikló'úpa. ²²E' dör wës ttë mokj i' tō iché es: “Chichi chöli tuéttšã, e' ukuökj tã inéwaneitö.”^a Ñies skã tō iché: “Köchi kuöwésö buaë, e' míã kuekane dó a.”

Skëképa Jesús dörane

3 ¹A yamipa dalër tajë ye' éna, ye' tō yëkkuö tsá kit a' a, e' skã shtekeyö a' a, i' tã ide böt. Yëkkuö böt e' kï ye' tso', ttë jchertke a' wã, e' chökne a' a a' pattök as a' er arne iska' tã iwã bikeitsö bua'iewã yësüesë. ²Ì yë' Skëkōl ttekölpã batse'r e'pa tō ká iaiäë, e' ska' a' er anú. Ñies ttë dalöiëno me'at Skëképa dör S'tsatkōkwak e' tō, e' ska' a' er anú. Sa' dör ittekölpã tsá, e'pa tō ttë e' yë' a' a.

³A' wã ijchenú bua'iewã tō ká i' erkewatke e' këwö ska' tã pë' serke suluë esepa döraë. Ie'pa tō ì sulu è wambleke wës ier sulu tō ikieke ia es. Ie'pa tō a' wayueraë ⁴tã a' a ichakeraë: “Jesucristo kablë' dökne ÷wës e' de? Ikkë tã kè iwër tã, ÷wé idir? Se' këképa blërlunebak, etã íyi kos mir iwák suë wës iyöne kuaë es.” ⁵Erë ie'pa wã ijcher tō ì cheke ie'pa tō e' kè yëne. Ie'pa kè kï ikiane ttsëno tō ká iaiäë Skëkōl tō ká jai ena ì kos tso' ia, e' yö' ittò è wa. Ñies ká i' ena ì kos tso' iki, e' yö' ie' tō ittò è wa. Ká i' dë'kã ie' wã di' a, es di' tso' ká i' pamik shkit. ⁶Ie'pa kè kï ikiane ttsëno tō ì ulitane bak senuk ká i' a, e' e'owã Skëkōl tō di' tajë bak e' wa. ⁷Erë

^a 2.22 Proverbios 26.11

ká jaì ena ká i' tso' i'ñe ta, e' kicha a'ria ie' wá iwák ttè wa dò mik ie' tò ięwekewa bö' wa aishkuö ta etä. E' kos tköraë mik pè' sulusipa shulirke kichatërkettsä e' këwö de etä.

⁸A yamipa dalër taië ye' éna, kè a' éna ichökwa tò Skëköl a ká etkè, e' dör wes duas döka mil eyök es, ñies duas döka mil eyök, e' dör wes ká etkè es. ⁹Skëkëpa Jesús kablè', e' wà tköraë. Ie' datskene sulitane shulök mik Skëköl kï ikiane etä. E' kè dör tò ie' kablè' e' chowa ie' éna wes pè' welepa tso' ibikeitsök es. E' kè dör es. Ie' kè kï ikiane tò yi weir aishkuö ta. Ie' kï ikiane tò sulitane er mane'ù ie' a. E' wà panuk ie' tso' enaë. E' kuekï ie' kam döne.

¹⁰Erë ie' dörane, kè tköpa. Mik ie' datskene, etä e' këwö döraë kè e' biyó yëule wes akblökwakpa döwa nañewe es. Mik ie' de, etä ká jaì kos blardaë taië ta ichörawa kè wërpaia. Ì kos tso' ká jaì a, e' ñardawa diardawa. E' sù ká i' ena ì kos tso' iki, e' ñardawa sekka, kè ì atukia. ¹¹E' kos erdawa es, e' ta çwes kè se' serpa batse'r e' tkëulewä darërë Skëköl è a? ¹²E' këwö panuk se' tso' poë, e' dalewa se' e' chò senuk wes Skëköl kï ikiane es as ikëwö e' dò bet. Mik e' këwö de, etä ká jaì ñardawa ena ì kos tso'ia, e' diardawa erdawa bö' wa. ¹³Erë Skëköl kablè' ká jaì pa'alì ena ká i' pa'alì e' yuök se' a. Wëpa serke yësyësë, esepa è serdaë ee. Ee ì sulu kè ta'. E' wà paneke se' tò poë.

¹⁴A yamipa dalër taië ye' éna, a' tso' íyi ekkè wà panuk, e' dalewa a' e' tkówa darërë senuk as mik e' këwö de, etä ie' tò a' kü senuk bèrè ñita, kè iauleka, kè kï ì sulu ttè ta'. ¹⁵A' éna ianú tò Skëkëpa Jesús kam dò, ie' tso'ia ipanuk as s'tsatkër. Ñies ttè e' kitat a' a yëkkuö kï s'yami Pablo dalër taië se' éna e' tò. Ie' tò ikitat erbikè taië me' Skëköl tò ie' a e' wa. ¹⁶Ttè i' kit Pablo tò yëkkuö kos kit ie' tò ekkè kï. Ie' ttè wele dör darërë, kè wà ar se' éna bet. Pè' welepa kè yöule buaë, kè e' tkëulewä buaë Jesucristo ttè a, esepa tò Pablo ttè darërë, e' wà shkulì'wekewa wes ie'pa tò Skëköl ttè kitule yëkkuö kï malepa, e' wà shkulì'wekewa es. E' nuí kï ie'pa weirdaë siarë.

Ttè bata

¹⁷A yamipa dalër taië ye' éna, íyi ekkè kos jchertke a' wä buaë. E' kuekï a' e' kko'nú pè' sulusi ñe'sepa yöki as a' kè tò ie'pa ttò iutò. A' tso' erki as a' e' tkëulewä buaë S'tsatkëkwak mik, e' kè olo'yò a' tò. ¹⁸Skëkëpa Jesucristo dör S'tsatkëkwak, e' er buaë ché se' a, e' ttè wa a' kï e' yuó. Ie' mik a' kï e' batsó bua'ie. iAs ie' kïkarka taië i'ñe ta ena këkraë! Es e' idir.